

Bebe rom bay goal y riba dje varios sabor

Si mi skirbi aki cu mi a bebe rom bay goal y varios sabor riba dje, mi conoci nan lo hari y lo no kere nada di esaki.

Mi nunca tabata un bebedor di bebida cu alcohol y esaki ta un berdad grandi.

Pero si mi bisa asina, esey ta tambe un mentira grandi.

Mi tata tabata gusta su **"bitternan"** y su **"cerveznan"** y mi rumannan tambe.

Ami semper a aleha mi di bebida di licor, sinembargo no por bisa asina 100%, pasobra mi por bebe un te 2 cervex un caminda, (normalmente un so ta pone mi bira mas burachi cu buracho) y na fiestanan mi bebida preferi ta rum-coke, pero suave.

E sorto di yena glas cu coke y tira poco rum aden pa e holo di rom. Mi ta kere cu ta na tur fiesta y actividad hende ta harimi den mi cara pa ta bebe **"holo"** di rom of whisky.

Mi a haya invitacion di Licores Aruba pa presentacion di nan sabornan nobo di rom.

Licores Aruba cu su hendenan halto cu sa masha bon di Juby, pasobra tur ora cu tabata tin presentacion di bebida alcoholico di cual nan ta agente,-- tempo cu mi tabata cubri e eventonan aki hopi riba caya -- semper tabata tin prepara malta of juice, special pa Juby.

Diahuebs anochi tabata un di e anochinan cu mi tabata liber y no tabata tin nada special di haci, y mi a haci e anochi aki **"mi anochi"**.

Mi ta bay e presentacion, y si e smak cai aden, mi ta purba un of mas di e sabornan.

Mi a bebe mi no sa cuanto rum-coke cu su **"limon"** y a dal **"shot"** di tur e sabornan **"puru"**, manda esakinan den stoma y spera e **"biramento di mundo"**, pa despues mi sali pafo y **"dal un saca di otro mundo"**.

Nada di esaki a pasa ! Mi a yega cas manera mi a sali di cas, y contento cu **"mi anochi"**.

Mi a topa cu Luis Posner cu mescos cu su tata Oiky, sa di mi estilo di bebemento, esta nada of casi nada.

El a puntrami: **"Kico abo lo por skirbi di rom, pasobra bo no ta amante di licor"**.

Mi di cune cu **"kico ami por skirbi di rom, ni e agentenan, ni bebedornan profesional ni conocedornan profesional di rom, no por, y ni mas efectivo cu mi"**.

El a hari, y a laga sa: **"Esey si mi no ta kere !"**

Naturalmente mi no por skirbi riba sabornan di rom, marcanan di rom, elaboracion di rom, pakico esun ta mihor of mas malo cu e otro, pero si mi por skirbi aki mi experiencia di **"mi anochi"**.

CANA ROND Y MIRA E BURACHENAN

Mi a dicidi di cana rond, conversa aki y aya cu e **"burachenan"**, e bebedornan ferviente di rom.

Mi no a topa cu ningun burache, pero si hopi **"newcomers"** tanto homber como muher.

Mi linea di tactica tabata: **"Mi conoce burachenan!"** y e ora ey e lenga ta los.

"Bo no ta keremi si mi bisa cu mi no sa bebe rom y cu awe ta prome biaha cu mi ta haci esaki; ta un mi ta dal pa purba, y esey ta tur; mi bebida ta X pero mi a haya smaak di purba esakinan;" y asina e contestanan a sigui sali.

Di 7.30 or pa 11.15 or cu mi a sali, mi no a mira ni un persona **"bao**

di su awa", **"Burachi"**, **"lenga pisa"**, **"ta slenter di un banda pa otro"** etc. pero tur a bebe por lo menos 4 bebida, y a purba sigur mayoria di e 5 sabornan cu tabata tin di Bacardi.

Mi a dreña auto cu e pensamiento: **"Pakico nos hendenan tin cu bebe di mas, abusa di alcohol, mientras cu aki por a mira con modera tur hende a bebe, y ta bay cas mes bon cu nan a sali di cas."**

Aki no tabata tin show di kende por bebe mas cu otro, of di dal un tras di otro. Tabata tin bebida **"pa tira afo"** y no tabata tin abuso di alcohol.

Kico mi experiencia tabata cu e sabornan ?

Pa bisa berdad, mi no a purba e **Bacardi Coco**, pasobra un biaha mi a yega di bebe otro bebida cu coco, y e no a cay na mi agrado.

Pero esey ta mi smaak, kizas miles di hende lo tin otro pensamiento..

Mi a dal dos shot di **Bacardi Orange**, pasobra mi a gusta e sabor cu pa mi tabata manera un cucui of aniz.

Kizas mi ta mal equivoccal cu e sabor menciona, pero mi a gusta e prome y a dicidi di dal e di dos pa mi ta sigur di kico mi a bebe y cu ta verdad mi ta guste.

Mi a gusta e shot di **Bacardi Vanila** pero ta un so mi a keda na dje.

Mi a laga **Bacardi Razz**, di raspberry un banda, pasobra mi smaak cu bebida cu raspberry no ta cay cu otro.

Atrobe....., si ami no ta gusta, no kiermeen cu centenares of miles di otro tampoco ta gusta cierto cos.

Kizas ami ta e unico pasobra tur otro hende si gusta.

Mi nunca a gusta raspberry aunke con bon raspberry ta pa salud.

Pero esun cu a cay mas na mi agrado tabata e **Bacardi Limon** di cual mi a bebe varios rum & cola.

Kico a pasami despues ?

Ayer mainta mi a pidi un conoci di mi cu a bay supermercado, pa e busca un **Bacardi Orange** y un **Bacardi Limon** pa mi tin na cas.

Anochinan cu mi ta sosega na cas y tranquil, mi sa bebe mi rum & coke (suave) sinta mi so den sala, lesando un buki, corant, revista of mirando television, y semper mi kier tin bebida na cas pa si encaso mi haya bishita.

E dosnan aki mi ta sigur lo cay na agrado di mi bishitantenan.

E "NEWCOMERNAN" A COMENTA

Mi a cana rond y conversa cu e **"newcomernan"** cu mi a menciona ariba.

E comentarionan tabata: **"Mi a purba tur!"** **"Mi a gusta esaki"**, **"Mi a gusta esaya"**. **"Mi nunca a kere cu mi lo bebe tanto rom"**. **"Mi no a dal shot pasobra mi kier a keda riba esaki"**.

Mi a mira varios di nan sali, y ningun di nan tabata muestra di **"tin bitter aden"**, **"di ta bao di influencia"** pasobra tur hende a bebe modera, goza di e anochi di show y musica, nan snacknan y nan bebidanan cu nan a purba e anochi aki, **"un tras di otro"**.

Pakico nos mester abusa di alcohol ?

Pasobra nos kier sinti nos mas macho cu otronan ?

Esaki ta ponemi corda e **"macho man"** Shon Ki cu ta bisa:

"Ora mi bebe rom, mi ta bira un tiger, y mas mi bebe, mi ta bira macaco, y ora mi ta bon bebi mi ta bira porco."

Pakico nos no por bebe rom y keda hende ?

Juby Naar